



1

GIPUZKOAKO LURRALDE HISTORIKOKO XEDAPEN OROKORRAK

GIPUZKOAKO FORU ALDUNDIA

OGASUN ETA FINANTZA DEPARTAMENTUA

130/2024 Foru Agindua, martxoaren 26koa, nekazariak eta abeltzainak gasolio erosketengatik jasandako hidrokarburoen gaineko zerga itzultzeko prozedura ezartzen duena.

Uztailaren 26ko 4/2023 Foru Dekretu Arauemaileak, Zerga Bereziei buruzkoak, 52 ter artikuluan xedatzen du nekazariak eta abeltzainak eskubidea dutela gasolio erosketetan hidrokarburoen gaineko zergarengatik ordaindu edo jasan dituzten kuoten itzulketa partziala jasotzeko, aurreko urte naturalean egin dituzten erosketak horiek foru dekretu arauemaile horren 50.1 artikuluko 1.4 epigrafean ezarritako zerga tasaren arabera zergapetu badira.

Itzulketarako eskubide hori 2007az geroztik egon da aldi baterako aitortuta, eta zenbait zerga aldatzeko onetsi zen 1/2010 Foru Dekretu Arauemaileak eman zion behin betiko aitortza.

Nekazariak eta abeltzainak gasolio erosketengatik jasandako hidrokarburoen gaineko zerga itzultzeko prozedura indarrean dagoen martxoaren 25eko 274/2010 Foru Aginduan arautzen da gaur.

Agindu horren 3. artikulua, nekazariak eta abeltzainak gasolio erosketak direla-eta jasandako kuoten itzulketa partziala eskatzeko eredia onesten duenak, besteak beste dio ezen SGA eredia, «Nekazariak eta abeltzainak gasolio erosketetan jasandako hidrokarburoen gaineko zerga itzultzeko eskaera» izenekoa, Herritarren Arretarako Bulegoetan, Landa Ingurunearen Garapen Departamentuaren mendeko eskualdeko nekazaritza bulegoetan edo Ogasun eta Finantza Departamentuaren egoitza nagusian aurkeztuko dela.

SGA eredia aurkezteko modua nabarmen aldatu da gaur egun, bitarteko elektronikoen erabilpenari ematen baitzaio lehentasuna, eta horrek eskaera horien tramitazioa erraztu du. Gainera, bai 2024rako eta bai hurrengo urteetarako, aurreikuspena da ereduaren paperezko aurkezpena Ogasun eta Finantza Departamentuko Herritarren Arretarako bulegoetan bakarrik egin ahal izango dela.

Horrek komenigarri egiten du erregulazio berri bat onestea berrikuntza horiek guztiak bildu eta nekazari eta abeltzainak gasolio erosketengatik jasandako hidrokarburoen gaineko zerga itzultzeko eskaerak aurkezteko prozedura eguneratzeko.

1. artikulua. Nekazariak eta abeltzainek gasolio erosketengatik jasandako hidrokarburoen gaineko zergaren itzulketa jasotzeko eskubidea aitortzea.

Nekazariak eta abeltzainak eskubidea aitortzen zaie gasolio erosketak direla-eta hidrokarburoen gaineko zergan jasandako kuoten itzulketa jasotzeko, baldin eta erosketak horiek aurreko urte naturalean eginak izanik Zerga Bereziei buruzko uztailaren 26ko 4/2023 Foru Dekretu Arauemailearen 50.1 artikuluko 1.4 epigrafearen arabera zergapetu badira, betiere foru agindu honetan ezartzen diren beharkizunak betetzen badituzte.

2. artikulua. Nekazariak eta abeltzainek gasolio erosketengatik jasandako hidrokarburoen gaineko zergaren itzulketa eskaera aurkezteko era eta epea.

Zerga Bereziei buruzko uztailaren 26ko 4/2023 Foru Dekretu Arauemaileak 52 ter artikuluan aipatzen duen eskubidea gauzatzeko, nekazaritza eta/edo abeltzaintza jardueran aritzen diren pertsonak gasolio erosketak egin diren urtea amaitu ondorengo urteko apirila eta maiatza bitartean aurkeztu beharko dute hurrengo artikuluan aipatzen den eredia, foru agindu honetan aurreikusitako baldintzetan eta bertan jasotako prozedurarekin bat etorritik.

3. artikulua. Nekazariak eta abeltzainek gasolio erosketengatik jasandako hidrokarburoen gaineko zergaren itzulketa eskatzeko eredia onestea.

1. Onetsita geratzen da SGA eredia, «Nekazariak eta abeltzainek gasolio erosketengatik jasandako hidrokarburoen gaineko zerga itzultzeko eskaera» izenekoa, foru agindu honetan eranskin gisa jasotzen dena.

2. Aurreko apartatuan aipatu diren eskaerarako, prozedura hauei jarraiki aurkeztuko da SGA eredia:

a) Aurkezpena paperean zein bitarteko elektronikoz bidez egin ahal izango da, Zerga Administrazioarekiko harremanetan bitarteko elektronikoz erabiltzera behartuta dauden zergadunen kasuan izan ezik; izan ere, kasu horretan, bide elektronikoz soilik aurkeztu ahal izango dute eredia, «Zergabidea» plataformatik abiatuta, Gipuzkoako Lurralde Historikoko Foru Zerga Administrazioarekiko harremanetan bitarteko elektronikoz erabiltzeko obligazioa arautzen duen ekainaren 28ko 320/2017 Foru Aginduan xedatutakoaren arabera.

Paperezko euskarria erabiliz gero, Ogasun eta Finantza Departamentuko Herritarren Arretarako Zerbitzuko edozein bulegotan aurkeztu ahal izango da eredia.

Bi aurkezpen modalitate horietan datu hauek jaso beharko dira:

1. Eskatzailearen IFZ –9 karaktere–, deiturak eta izena edo sozietate izena, eta zerga helbidea.
2. Zerga Bereziei buruzko uztailaren 26ko 4/2023 Foru Dekretu Arauemailearen 50.1 artikuluko 1. tarifaren 1.4 epigrafean ezarritako tasaren arabera zergapetutako gasolioa (aurrerantzean gasolio hobaritua) kontsumitu duten ibilgailuen matrikula.
3. Gasolio hobaritua kontsumitu duen makina edo aparatu mota eta fabrikazio zenbakia.
4. Gasolio hobarituaren erosketak gasolio hobaritutako txikizkako saltzaileei egin eta uztailaren 7ko 1165/1995 Errege Dekretuaren bidez onetsitako Zerga Berezien Erregelamenduko 107. artikuluan aipatzen diren ordainbide espezifikoak erabiliz ordaindu badira, aitortzaileak, establezimendu berean egin eta gasolio hobarituaren txartelak edo txekak erabiliz ordaindu diren erosketak guztiak aintzat hartuta, modu globalean zehaztu beharko du guztira zenbat litro gasolio hobaritu erosi

diren, eta datu hori eskaeran adierazi; datu horrekin batera, honako hauek ere jarri beharko ditu: ordainbide horiek erabiliz ordaindutako zenbateko osoa, eta gasolio hobarritua erosi den txikizkako establezimenduaren Jarduera eta Establezimendu Kodea (JEK).

Gasolio hobarrituaren erosketak ez badira egin gasolio hobarrituko txikizkako saltzaileen establezimenduetan, aitortzaileak datu hauek adierazi beharko ditu, hornidura bakoitzeko edo faktura berean bildutako hornidura multzo bakoitzeko: fakturaren zenbakia eta data, erregaia erosi den establezimenduaren jarduera eta establezimendu kodea (JEK), erositako gasolio hobarrituaren litro kopurua eta ordaindutako zenbatekoa, biak bi dezimalekin biribilduta.

5. Itzulketen transferentziak jaso behar dituen IBAN kodea.

b) Eskaera paperean aurkeztuz gero, eskatzaileak sinatuta, edo hala badagokio, itzulketa eskaerak hirugarren pertsonen izenean aurkezteko baimena duen pertsonak edo entitateak izenpetuta aurkeztuko da.

4. artikulua. Egindako horniketengatik ordaindutako kuotak itzultzea.

Aurreko 3. artikuluan adierazitako eran aurkeztutako eskaerak aintzat hartuta, Ogasun eta Finantza Departamentuak, hala dagokion kasuetan, erabakiko du bidezkoak diren kuotak itzultzea onuradunak eskaeran adierazitako banku kontura transferentzia bat eginez.

5. artikulua. Itzulketaren onuradunen obligazioak.

Foru agindu honetan esandakoagatik hidrokarburoen gaineko zergaren itzulketa jaso behar duten titularrek behar diren fakturak eduki beharko dituzte itzulketa eskaeran adierazten diren horniketak frogatzeko. Onuradunek 4 urtez gorde beharko dute dokumentazio hori, eskaera aurkezteko epea amaitzen den egunetik aurrera.

Era berean, derrigorrezkoa dute gasolio erosketak egin dituzten urte berean izena emanda egotea, jarduera horiei dagokienez, enpresaburu, profesional eta atxikitzaileen erroldan, baita aitortpena aurkeztuta edukitzea ere pertsona fisikoen errentaren gaineko zergarengatik edo sozietateen gaineko zergarengatik, nekazaritza edo abeltzaintza jardueran aritzeko aukeratutako izaera juridikoa zein den.

Xedapen gehigarri bakarra. Ogasuneko Zuzendaritza Nagusiaren titularra gaitzea.

Ogasuneko Zuzendaritza Nagusiaren titularrak beharrezkoak diren xedapenak edo jarraibideak eman ahal izango ditu foru agindu honetan jasotakoa gauzatu eta betearazteko.

Xedapen indargabetzailea.

Indarrik gabe geratzen da 274/2010 Foru Agindua, martxoaren 25ekoa, nekazaritzan eta abeltzaintzan gasolio erosketak direla-eta jasandako hidrokarburoen gaineko zerga itzultzeko prozedura ezartzen duena.

Azken xedapena. Indarrean jartzea.

Foru agindu hau Gipuzkoako ALDIZKARI OFIZIALEAN argitaratu eta biharamunean jarriko da indarrean.

Donostia, 2024ko martxoaren 26a.—Ogasun eta Finantza Departamentuko foru diputatua.
(2326)

